

समे – 12:25

<><><><><><>

VP-Jammu Visit

उपराष्ट्रपति जगदीप धनखड़ होर इक दिनै दे दौरे पर अज्ज जम्मू पुज्जे जिस दौरान उनें कटड़ा च श्री माता वैष्णो देवी यूनिवर्सिटी दे 10में दीक्षांत समारोह दे मुख्ख परौहने दे तौर पर अध्यक्षता कीती ते विद्यार्थिएं गी डिग्रियां मे मैडल भेंट कीते। इस मौके उपराज्यपाल मनोज सिन्हा, मुख्खमंत्री उमर अब्दुल्ला ते शिक्षा मंत्री सकीना इत्तू होर बी मजूद हियां। एह्दे शा पैहले हवाई अड्डे पुज्जने पर उपराज्यपाल मनोज सिन्हा ते मुख्खमंत्री उमर अब्दुल्ला होरें चंदा सुआगत कीता। आकाशवाणी दे जम्मू संवाददाता दी जानकारी मूजब उपराष्ट्रपति हुंदा त्रिकुटा पहाड़ियें पर स्थित श्री माता वैष्णो देवी दी गुफा ते भैरो मंदर जाइयै मत्था टेकने दा बी कार्जक्रम ऐ।

<><><><><><>

CM Pre Budget

मुख्खमंत्री उमर अब्दुल्ला होरें कल सिविल सचिवालय जम्मू च पुंछ ते राजौरी जिले दे विधायकें कन्नै बजट शा पैहले सलाह सूत्र आली बैठके दी प्रधानता कीती। मुख्खमंत्री होरें आखेआ जे इनें बैठकें दा मकसद लोकें दे नुमायंदे थमां लोकें दी प्राथमिकता ते आसे—मेदे बारे जानकारी हासल करना ऐ। उनें आखेआ जे एह् सरकार दी जिम्मेदारी ऐ जे नमीं परियोजनाएं दे कन्नो कन्नी जारी परियोजनाएं गी समें सिर पूरा करना जकीनी बनाया जा। मुख्खमंत्री होरें समावेशी विकास दे महत्व उप्पर ते लोकें दी आसें—मेदे पर खरा उतरने दी लोड़ पर जोर पाया। उनें आखेआ जे विधायकें आस्सेआ उजागर कीती गेदी जरूरतें, मामलें ते प्राथमिकता गी औंदे बजट च शामिल करने लेई बचार बमर्श कीता जाग।

<><><><><><>

LA Session

जम्मू कश्मीर विधानसभा सचिवालय आस्सेआ कल अपने दुए इजलास दे कार्यक्रम दा कलेंडर जारी कीता।

आकाशवाणी दे जम्मू संवाददाता नै जानकारी दित्ती ऐ जे एह 7एं ब'रे परैंत पैहली बारी ऐ जे जम्मू कश्मीर च लोकें आस्सेआ चुनी गेदी सरकार बजट पेश करोग, जेहड़ा स्पीकर अब्दुल रहीम राथर हुंदे आस्सेआ जारी दस्तावेज मूजब 7 मार्च गी पेश कीता जाग। विधानसभा दा इजलास 3 मार्च गी उपराज्यपाल हुंदे अभिभाषण कन्नै शुरू होग। 4 कोला लेइयै 6 मार्च तोड़ी उंदे अभिभाषण पर धन्नबाद प्रस्ताह पर चर्चा होग। ते 7 मार्च गी 2025–26 ब'रे लेई बजट पेश कीता जाग। ओहदे बाद 8 कोला लेइयै 11 मार्च तोड़ी बजट पर आम बैहस होग ते बैहसू पर परता 11 मार्च गी दित्ता जाग। 12 मार्च कोला लेइयै 25 मार्च तोड़ी असेंबली दी कारवाई दरान ग्रांट मंगा पेश कीतियां जांगन जिसलै जे 11 अप्रैल शुक्रवारें बजट इजलास संपन्न होई जाग।

<><><><><><>

Union Minister

केन्द्री मंत्री प्रहलाद जोशी हुंदी अध्यक्षता च इक केन्द्री टीम नै कल चंडीगढ़ च करसानें दे नुमायंदे कन्नै मालाटी लाइयै उंदिएं बक्ख-बक्ख मंगें दे बारे सोच बचार कीता। दौनें धड़ेंदी अगड़ी बैठक इस्सै म्हीने 22 तरीक गी लगगोग। इस बारे मीडिया कन्नै गल्ल करदे होई प्रहलाद जोशी होरें आखेआ जे करसानें कन्नै एह बैठक बड़े गै साजगार ते शांतिपूर्ण माहौल च लग्गी जिस दरान करसानें गी मोदी सरकारआस्सेआ उंदी भलाई बेहतरी लेई शुरू कीती गेदिएं स्कीमें ते कार्यक्रमें दे बारे जानकारी दित्ती गई। मीटिंगें च करसानें दे दऊं संगठने दे प्रतिनिधिएं हिस्सा लैता जिंदे च यूनाइटेड किसान मोर्चा ते किसान मजदूर मोर्चा शामिल न।

<><><><><><>

Select Committee

लोकसभा अध्यक्ष ओम बिरला होरें नमें इंकम टैक्स बिल दी जांच लेई 31 मिनबरें आली सलैक्ट कमेटी दा गठन कीता ऐ। समिति दे अध्यक्ष बीजेपी दे सांसद बैजयंत पांडा होंगन। एह समिति संसद दे अगले इजलास दे पैहले रोज अपनी रिपोर्ट पेश करग। इंकम टैक्स बिल 2025 गी जंदे वीरवारें लोकसभा च पेश कीता गेआ हा ते एहदा मकसद इंकम टैक्स सरबंधी कनूनें च मजूदा समें दिएं जरूरतें मूजब बदलाव ते सुधार आहन्ना ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्ने बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किशत होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800—11—7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिक्का प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

Women Cricket League

क्रिकेट च महिलाएं दे प्रीमीयर लीग दे पैहले पैहले मैच च कल रॉयल चैलेंजर्स बेगलुरु नै गुजरात जायंट्स गी हराई दित्ता। एह मैच बड़ोदरा दे कोटांबी स्टेडियम च खेड़डेआ गेआ। 202 रंजें दे बड़डे लक्ष्य दा पिच्छा करदे होई आरसीबी नै एह लक्ष्य 6 विकेटां बाकी रौहदे होई ते 9 गेंदा बाकी रौहदे होई गै पूरा करी लैता। पैहले बल्लेबाजी करदे होई गुजरात जायंट्स नै निर्धारित 20एं ओवरें च 5 विकेटें दे नुक्सान पर 202 रंज बनाए। आरसीबी आस्सेआ रीचा घोष नै 27 गेंदे च नागाद 64 रंज बनाए ते इलाइ पैरी नै 34 गेंदें च 57 रंज बनाइयै बड़डा लक्ष्य हासल करने च अनमुल्ला योगदान दित्ता। तोआई गुजरात जायंट्स दी टीम आस्सेआ एशलीग गाडनर नै 37 गेंदें च 79 रंज बनाए। रीचा घोष गी प्लेयर ऑफ द मैच दित्ता गेआ।

<><><><><><>

Weather

मौसम विभाग नै जम्मू कश्मीर च औंदी 18 फरवरी तगर मौसम दे आम तौरा पर खुशक रौहने दी पेशगोई कीती ऐ।

मैहकमे दा आखना ऐ जे अज्ज मौसम खुशक बने दा रौहग जिसलै के कल संजा'लै मौसम बदलोखडा रौहने दे ते प्रदेश च उप्परली धारें पर हल्की बरखा जां बर्फबारी दी मेद ऐ। 12 फरवरी ते 13 फरवरी गी उप्परली धारें पर बरखा बरी सकदी ऐ। पर आम तौरा पर मौसम च मता बदलाव दिक्खने गी नेई लब्भोग।

<><><><><><>